

U
E N Ω T I K O N,
S I V E
De Causis Remediisque
Dissidiorum,
Quæ orbem Christianum hodiè affligunt,
Exercitatio
T H E O L O G I C A.

Authore T. S. Sacræ Theologiæ Baccalaureo, &
Collegii B. Mariæ Magdalene Oxon: Socio.

O X O N I I,
Excudebat H. Hall celeberrimæ Academiæ,
, Typographus, Impensis Ric. Davis.
M. DC. LXXV.





Epistolæ ad Romanos Cap: xiv. Vers: xix.

*Quæ ad Pacem faciunt, seſtemur, & quæ ad
mutuam Edificationem.*



QUANTUM salutaris illa *Chriſtiane Religionis* doctrina conducat univerſæ paci ſtabiliendæ, ultra quam humani ingenii vires in unum collectæ vel comminifci poſſint, utinam id tum eventu congruo, tum vitâ & moribus *Chriſtianorum* adeò compertum haberetur, ac ex designatione *Chriſti* æque debitis *Sanctiſſimæ Inſtitutionis* finibus ſit teſtatiffimum. Ne ſimultates in inimicitiam erumpant, ne inimicitia in odium, quali ſeveritate vel primos Affectuum impetus in ordinem cogendos docet perfectiſſima illa vivendi Norma! quale imperium dat menti, ut tumultus qualeſcunque, quos ira, quôſve cupido ciet, facilè compeſcantur! Quali curâ vel *Deo* dignâ illic cautum eſt, ne quis de proximo malè mereatur, ut neminem, ne hoſtem quidem, animo hoſtili tractet, magiſque ab injuriis retorquendis quàm à morte ſubeundâ metuat, ut omnibus, non ſeg-

nitèr quidem inertique voto , sed pro virili , benefaciat , ut denique vitam salutemque propriam alieno commodo posthabeat ! Quali majestate verborum divinus ille *Legis Christianæ lator* sancendum curavit , ut cuiuspiam jura , sorte nascendi , vel qualicunque modo , quem communis vitæ usus Legumque civilium vigor introduxere , debita , ipsi consent , integræque maneant ! Quam felix autem mundum bearet Pax nunquam interrumpenda , si nulla vis adhiberetur , si ab alienis invadendis penitus esset abstinendum , si propriâ , quam largitur *Deus* , sorte quisque contentus , in illud quod aliorum est vi & armis non grassaretur ! Ita à *Christo* optimè consultum erat humani generis commodo , ultra omnem vel prudentissimorum *Legislatorum* institutionem . At de iis , qui *ipsi* nomina dederint , & in omne ævum daturi essent , quanto sanctiori curâ æstuabat *Christi* pectus , ut mutuus ille amor , quem eadem *Fides* , quem eorundem *Sacrorum* communio , quem ejusdem beatissimæ sortis in Cœlis fruendæ spes tot tantisque nominibus poposcera , promptissimâ sibi invicem benefaciendi voluntate , charitatisque , cum frequens postulaverit occasio , officii augeretur & in æternum perennaret ! in hoc adeo intentus erat , quasi animam effusus , antequam cruci affixus moreretur , utpote qui mundo valedicturus in illâ *Divinissimâ Oratione* , apud *D. Johannem* . cap : xiv . (quâ Discipulos non tam docuit , licet & docuit potentissimè , quàm demissè , si ita loqui fas sit , & humillimè , & affectu planè obstupescendo obtestatus est ,) nihil antiquius potiùsve habuit duxitque , nihil , quod ipsi charius , illisve utilius videretur , nihil , quod ipsius amorem ostenderet magis , aut magis ipsorum curam mereretur .

Huic

Huic autem postulado, cui præsidio erant tum summa illa, quâ nititur, auctoritas, tum æquissima ratio, ne sine impietatis & sacrilegii reatu, aut sine periculo propriæ salutis à quoquam violaretur, quis crederet ipsos *Christianos*, *Christi* juxta ac sui immemores, usque adeò audere, ut contra eant, quasi non amore mutuo aut animorum consensu, sed convitiis, sed partium studio, sed dissensionibus, sed odio *Christiani* esse dignoscerentur? Diu est, ex quo hanc vesaniam luens, tantis malis ingemuerit *Ecclesia Catholica*, infidæ, uti videtur, paci, à tot lanienis stragibusque, quibus ab *Ethnicis Imperatoribus*, qui collabentem *Idololatriam* his quasi tibicinibus suffulciendam putaverint, ubique sævitum erat, & sibi denuò restituta, ut à *Christianis* longè atrociora pateretur, per quorum ferociam vix habuit, quod de *Neronibus*, de *Deciis*, de *Diocletianis* vel minimùm quereretur. Quos enim metus, quos pudor, quos *Christiani* nominis reverentia, quos commune periculum sibi invicem antea intimo affectu conciliaverant, cum jam non amplius à *Gentilium magistratum* Tribunalibus, ab armatis militibus, à crucibus, à leonibus, à flammis metuendum esset, cum securissimè liceret esse *Christianis*, cum *Imperium Romanum*, quantum quantum erat, in fidem, quam tanto furore nuper amolitum iverit, transisset, hâc stupendâ felicitate & otio, quod *Deus* fecerat, malè usi, in se, cum hostes deessent, procacitè satis insolescere ceperant. *Fidei* simplicitate insupèr habitâ, de opinionibus & ritibus, quasi *salus æterna* ab iisdem pependisset, acriter certatum est, unde amissâ charitate, dum quisque altercando victoriam sibi meditatur, malæ suspicio-

nes & jurgia *Schismati* viam aperuerint. Hinc *altare* adversus *altare*, *cathedra* adversus *cathedram* erigitur, & malefani seditiosique oratores è pulpitis clasticum canunt ad *bellum sacrum*, tanquam cum *hostibus Christi* pro summâ *Religionis* conflicturi: hinc à mutuâ communione utrinque abstinendum esse pierati ducunt, quasi cum *Ethnicis* & *Judeis* minori cum periculo & reatu esset communicandum. Hinc odiosæ criminationes impacis, execrabilésque tituli, quasi à *Fide Christianâ* penitus defecissent: è quibus iniquissimis censuris tandem oritur odium planè irreconciliabile, & nullâ arte, obsequio nullo, dum hæc malas opiniones animo insidere patiuntur, emolliendum.

Tantum verò abest, ut fatale hoc incendium, quò dudum exarsit *Ecclesia*, quicquam hodiè remittat virium, ut, novo fomite addito, majori impetu sæviat, ita ut flammis ipsius neutiquàm sit obsistendum. Quotusquisque est à misericordiâ, à pietate, ab affectu humano adeò alienus, qui *tumultuum*, quibus adhuc dum concutitur *orbis Christianus*, meminisse totus non horreat? non illos volo *tumultus*, quibus, flagrante bello, iratis manibus tot opimis victimis impio & barbaro ritu immolatum est, sed quos hæc *sacerrima* circa *Religionis* apices *diffidia* excitarunt, in quibus ne animabus quidè parçitur, dum illæ ad *Gebennam*, ad æterna supplicia dirissimis *excommunicationibus* *sententiisque* *decretoriis*, quantum valet furiosus hic *Zelus*, damnantur. Ita nimirum summæ pietatis esse videtur malè iis augurari, à quibus vel in leviculis erit dissentiendum. Interim dum quisque ambitioni, famæ, ingenio strenuè velificatur,

dum.

dum parti, quam vel fors ingerit, vel præjudicium, institutio, aut commodum suadent amplectendam, perquam immoderatè faver, dum mundanus amor, metusque, ne quicquam famæ, honori, pompæ inde decedat, veritati obstruunt, dum præfracta mentis obstinatio omnem *tolerantiæ* aditum præcludit, licet dissidia æterna fortassè nolimus, invidiâque tantæ criminationis à nobis ipsis ingenti cum industriâ amoliamur; per sœcordiam proterviâque nostram planè obstat, quo minus ea sopiantur, dum non juxta præscriptum *Apostolicum*, quæ ad pacem faciant, sectamur, nec quæ ad mutuam ædificationem.

In horum tumultuum, quibus *Christiani* in opprobrium tam sanctæ & venerandæ professionis tantâ cum acritate inter se hodiè committuntur, originem inquirendum proposui, unde nimirum ac quibus de causis ab hâc mansuetâ indole, & ab hoc *pacis & mutue ædificationis* studio, quod his in verbis affectu paterno suadet, & autoritate *Apostolicâ* jubet *Sanctus Paulus*, discessum fuerit; deinde ecquid spei reintegrandæ *Pacis Ecclesiasticæ* inter *Christianos* reliquum sit, quibûsque tandem remediis, horrendis istis malis, quibus *Orbis Christianus* propemodum conficitur, occurrendum sit, exploratum ibo.

Quod ad primam disquisitionis nostræ partem spectat; Ea quæ *Christianorum dissidiis* originem dederint, & ne fraterno, qualem esse decet, affectu, eorundemque sacrorum consortio simul coalescerent, maximè fuerint impedimento, his sequentibus capitibus concludam: cæteris omissis, quæ sunt levioris momenti, vel ad hæc faciliè reducendis.

Quorum primum & præcipuum videtur, eò quòd à simplicitate fidei Christianæ immane quantum discedatur.

Cum nascente Christianismo Apostoli miraculis reliquisque Spiritus Sancti donis ad id muneris feliciter exequendum cœlitus instructi, quilibet nempe in propriâ provinciâ, prout ipsi sortitò obtigisset, Evangelii præconium fecerint, non res erat adeò operosa, quod ad fidei doctrinam spectat, nec tantâ disquisitione indigebat, fieri Christianum: cujus equidem mysteria in ingentem non excrevisse numerum hinc abundè constat, quod summa credendorum in brevem epitomen formulamque ab iisdem redigeretur, eamque simplicem, ac sine difficilibus tortuosisque verborum nodis ambagibusque nudè & clare propositam, ut licèt res ipsæ humani intellectus vim planè exsuperent, & ab ingenio, ut ut subtili & curioso, frustrâ captentur, ne Idiotæ quidem, minusque gnari, siquid sapiant, sibi quoque hâc in re non consultum fuisse causari debeant. Hæc autem Fides in regionibus maximè diffitis, quibus nullum commercium intercesserat, una eademque emicuit; non aliter Romæ aut Corinthi quàm Hierosolymis credebatur. Eodem spiritu acti, Christianos, quotquot uspiam erant, eadem creditu necessaria docuère: inde mirabilis ille istiusmodi Dogmatum apud omnes consensus erat, quasi non seorsim sed communi Apostolorum simul præsentium Consilio totum illud sanctissimum negotium perageretur. Extremo enim Orientali hâc ex parte cum Britannis nostris conveniebat, quasi primis illis Ecclesiæ seculis sine beneficio & usu
Pxi-

Pixidia nautica, ingenti Oceano peragrato, paritèr ac hodie, hâc illâc facile esset navigatum. Quod utique de reliquis dicendum est, uti præclare ostendit *Sanctus Irenæus* in Libro 1^o. adversus *Hæreses* cap: 3^o. inde *Fidei* veritatem, è tot nimirum *Gentium*, quas tanta locorum intercapedo, tanta tum sermonis tum Morum dissimilitudo, & tot Maria interfluentia à se invicem discriminârant, consensu, ineluctabili argumento evicturus, * *Nam etsi*, inquit, *in mundo loquelæ dissimiles, sed tamen virtus traditionis una & eadem est, & neque hæ, quæ in Germaniâ fundatæ sunt, Ecclesia aliter credunt, aut aliter tradunt, neque hæ, quæ in Iberiis sunt, neque hæ, quæ in Celtis, neque hæ, quæ in Oriente, neque hæ, quæ in Ægypto, neque hæ, quæ in Libyâ, neque quæ in medio mundi sunt constitutæ: sed sicut sol creatura Dei in universo mundo unus & idem est, sic & lumen & prædicatio veritatis ubique lucet, & illuminat omnes homines, qui volunt ad cognitionem veritatis venire. Ita Ille.* Omnibus itaque in ejusdem *Fidei* professionem sacro *Baptismi* ritu receptis, si fortè fortunâ alter alteri intervenisset, diversarum licet *Gentium*, agnitâ hâc *Fide*, quam uterque habuerat communem, in mutuos amplexus hic & ille ruebant, quasi inte-

* Καὶ ὅτι αἱ τοῦ κόσμου διάλεκτοι ἀνόμοιαι, ἀλλ' ἡ δύναμις τῆς ἀληθείας μία καὶ ἡ αὐτή. Καὶ οὕτως αἱ ἐν Γερμανίᾳ ἱδρυμένα Ἐκκλησίαι ἀλλως πιστεύουσιν, ἢ ἄλλως ἀρεσκόμεναι, οὕτως ἐν Ἰβηρίᾳ, οὕτως ἐν Κελτίς, οὕτως καὶ τὰς Ἀνατολὰς, οὕτως ἐν Ἀγύπτῳ, οὕτως ἐν Λιβύῃ, οὐαὶ καὶ μίαν τὴν κόσμον ἱδρύναι: ἀλλ' ὥσπερ ὁ ἥλιος τὸ πᾶν κόσμον τὸ διὰ ἐν ὅλῳ τῷ κόσμῳ εἰς καὶ αὐτὸς, οὕτως καὶ τὸ κήρυγμα τῆς ἀληθείας πανταχὺ φαίνεται, καὶ φωτίζει πάντες ἀνθρώπους, τοὺς βλομένους εἰς ἐπίγνωσιν ἀληθείας λαβεῖν.

gram ætatem sub *iisdem Magistris* simul contrivissent. Neque aliter fieri potuit, quia nondum ab *Institutionibus Apostolicis*, per Innocentiam, per Zelum, per Constantiam istorum temporum erat variatum: non quasi in omnibus convenisset, nullâ opinionum varietate interpositâ: (Hoc enim in tantâ Ingeniorum varietate neutiquam sperandum erat, & absurdus est, quàm ut id quispiam vel somniando fingat) modò de *integrâ in Christum Fide* constiterat, in cæteris impunè & sine censurâ licuit secus opinari. Neminem præjudiciis suspicionibusque iniquis prægravabant: à tali, tanquam à sacro & piaculari capite, non censuere aufugiendum.

At dum in *Ecclesiâ* constituendâ indefesso prædicationis labore per universum terrarum orbem insudatum esset, quo Posteritati, post illos inter *Calites* receptos, in omne ævum melius consulere-
tur, eandem, quam prædicarant, *Fidem* in æternis monumentis consignatam voluere *iidem Sanctissimi homines*, ut hæc oracula falli nescia, si quod dubium oriretur, si quis audaculus lasciviente ingenio fretus rebus studeret novis, si quod novum dogma *Apostolicæ traditionis* prætextu introducere quispiam malè feriatu satageret, sciscitatum iretur. Ad hos itaque *sacros codices*, tanquam ad *normam Fidei*, ubique erat provocatum; ex hoc illibato fonte *veritatis divine* latices petebantur: hinc an quispiam de *Fide* rectè an malè senserit, disceptatum: modò *veritati Evangelicæ* non detractum erat, de quæstionibus subtilibus nulla lis cuiquam movebatur. Eodem Communione jure quisque gaudebat,

bat ; iisdem Sacris pietate concordi simul interfut-
 ère , à quibus , si quispiam pro necessitatibus
 disciplinæ arceretur , illud malis ipsius moribus ,
 quos hâc methodo *Ecclesia* emendandos cupiebat ,
 unicè erat imputandum.

Cum verò *Hæreticorum* pertinacia, subtilibus male-
 sani Ingenii argutiis strophisque freta , *scripturali-*
bus Fidei propositionibus sibi minimè acquiescen-
 dum duxerit , cum in *arcana Cæli* , quibus inve-
 stigandis planè deficit intellectus , sacrilego ausu
 involârit , cum *revelationibus* rejectis insupérque ha-
 bitis , *veritati Evangelicæ* reclamârit , cum deni-
 què malis artibus à verâ *Fide* retinendâ imbecillio-
 res , quos hoc exitiale virus affârat , avellerentur ,
 de *Consiliis æcumenicis* indicendis , ne ex læsâ *Fide*
 laderetur simul *pax Ecclesiæ* , à *Constantino* reliquîs-
 que piissimis *Imperatoribus* seriò erat cogitatum.
 Tot verò *heroum* , qui illic convenerant , labor
 non in condendis *novis articulis* , sed in *veteribus*
explicandis totus impendebatur : horum enim vetu-
 ère tum zelus , ne *antiqua Fides* *antiquæ* *Traditionis* h.
 e. *simul tradita* faceretur abirétque in desuetudinem ,
 tum pietas , ne *nova* procuderetur. Quid enim aliud ,
 ut *Vincentii Lirinensis* cap : xxxii. *Commonitorii* ver-
 bis utar , *Consiliorum Decretis enisa est* [Christi Ec-
clesia] *nisi ut quod antea simpliciter credebatur , hoc*
idem postea diligentius crederetur , quod antea lentiùs
predicabatur , hoc idem postea instantius predicaretur ,
quod antea securius colebatur , hoc idem postea sollicitius
excoleretur ? hæc *Ille*. Itaque quo penitus obmutef-
 ceret *Hæresis* , seque elisam victâmque fateretur ,

Scripturarum sacrarum præsidio potissimum fulti, constantissimâ omnium *Christianorum* de *Fide* rectè sentientium, seculis retroactis, *praxi*, & antiquissimis iisque verissimis *Traditionibus* in subsidium quoque adhibitis, *veritati Christianæ*, quam *Arius*, *Nestorius* reliquique infames *Hæresiarchæ* officiiis & glossematis corruperant, brevibus *Symbolis* optimâ quidem curâ prospexerunt, ut inde *Mysteria fidei*, quibus *religio Christiana* *salusque Christianorum* innituntur, melius explicatiûsque perciperentur. Hoc insigni, quotquot ejuratâ perfidiâ ab *ipsius* partibus steterant, ab *Hæreticis* secrevit, hoc vinculo ipsos invicem firmiùs colligavit *Ecclesia Catholica*, utpote his tesseris productis, pro *Amicis*, pro *Fratribus*, pro *Catholicis*, ubicunque essent terrarum, planè habitos. Neque enim alio auctoramento, commendatione aliâ opus erat; uti postea apud *Orthodoxos formatarum Epistolarum* commercio communionem *Ecclesiasticam* mutuò colendi & fovendi pia & laudabilis invaluit consuetudo. Nec aliud *veræ Fidei* retinendæ exigebatur *Argumentum*. Quàm benè *Ecclesiæ Catholice* cessurum sit, si intra hos limites obtinendæ *Communions* ratio constaret, cuivis vel lippienti facile intueri est: si *antiquâ Fide*, quæ tot *Christianorum* myriades æternæ salutis compotes reddiderit à *novarum opinionum*, quibus superstitio & innovandi libido originem dederunt, corruptelis assumentisque manente integrâ, *iisdem conditionibus*, quas *vetus Ecclesia* pro summâ autoritate figendas curaverat, sacris interesse liceret, non adeo ubi-vis esset laboratum. Facili hâc methodo *Schismati*
irerunt

iretur obviam: concessâ hâc in cæteris, quæ *Fidei fundamentum* non attingunt, aliter sentiendi libertate, quod æquissimum est, *paci æternæ* consuleretur. *Romanam* ideo *Eclesiam* violatæ pacis ream jure merito postulamus, quæ refixis *primæve antiquitatis* Regulis, *novos Articulos*, tanquam *Fidei magistra*, licet sub specioso *Declarationis* titulo & prætextu, *Orbi Christiano* obtrudit. Qualis autem hæc *Tyrannis*, ut nullâ *Scripturarum*, nullâ veterum *Ecclesiæ* seculorum habitâ ratione, ex arbitrio *Curie Romanæ* æque *Scholasticorum* opinionibus tota pendeat *Christianorum Fides*, ut à *Communione* arceantur reliquæ *Ecclesiæ*, nisi se in Clientelam ipsius turpiter dedant in fide erudiendas, ut denique odio *schismaticorum & Hereticorum* stigmate inurantur, quotquot jus suum adversus *novaturientium* machinationes eunt vindicatum? Ad *Scripturarum* normam exigatur *Fides*; Primorum temporum *doctrina* in Criterium *sane fidei* statuatur; in usum revocentur *antiqui Canones*; nullâ vi *Conscientiis* illatâ, faceessant iniquissimæ conditiones; revocabitur quoque *pax Ecclesiastica*, omniâque in orbe Christiano salva futura sunt.

Inde enim aliud *Pacis* ineundæ *impedimentum*, oritur, quod secundo loco memorabo, nimirum quod *dogmata*, quæ salvâ *fide* ignorari possint, longè majoris æstimentur, quam par est, inque rerum ad salutem creditu *necessariorum* censum præpropere zelo transeant.

Cum *Romanis*, ad quos scribit B. *Apostolus*, de *Fide in Christum*, æternum *filium Dei*, verumque *Mes-*

siam & humani generis Redemptorem convenisset, ne in odium leviculis de causis exortæ diffensiones ulterius exardescant, hoc in capite cavet maximè. Non enim eadem erat omnium de *cessatione Legali* opinio. Qui *adultiorem Fidem* nacti fuerant, sibi de erepto *Judeorum Rituum* jugo gratulabantur; dum cæteri, de *libertatis Christianæ Privilegiis* haud satîs firmitè instructi convicique, neminem, saltem *Judeum* neminem, ab iisdem *Ritibus* observandis acritèr contendunt eximendum. Hinc *sententiis damnatoriis* in sese tanquam in *violatores Legis divine* fulminant, sibi que pessimè ominantur; quasi utrosque idem Cælum non recipiat. Quid ad hæc *Apostolus*? Hanc animorum impotentiam ipsi maximè displicere docet, utpote à moribus *Christianorum* alienissimam; neminem tantillâ de re in æternum periclitaturum; infirmioribus, quibus veritas ista non adeò clarè patebat, hæc ex parte paululùm indulgendum esse; nec ab his *fidem Christi*, quam susceperant, ejuratam, qui vim *aliquam* obligationemque rituum retinendorum adhuc restare censuerint, nec ab illis *Legem Divinam* quoquo modo laxam, qui *nullam*; à *mutuâ Communione* hæc de causâ non alterutrinque abstinendum; liberum cuique judicium permittendum, modò in *Christum* rectè credat; *fidem* hanc *communem*, de quâ inter utrosque convenit, esse validum satis futura *concordiæ* fundamentum; & denique *paci ædificationique mutuæ* potius studendum esse, quàm *inutilibus Controversiis*, quæ ad *nem Christianam* promovendam, quæ ad utriusque partis beneficium commodumque, quæ ad sanctita-

tem.

tem vitæ bonosque mores, ne minimum quidè, nihil planè faciunt.

Quanto moderatius se gesserint, qui posthabita pace ob opiniones longè minoris momenti, quàm de quibus hic certatum erat, *Ecclesiam Catholicam* convulsum eunt, quasi ejusdem essent cum *divinis oraculis Authoritatis*, & eàdem plenissimâ fide amplectendâ, si *Apostolum* ipsis in exemplum mansuetudinis hic præeuntem sequerentur! *Fidem habes*, uti ille *vir sanctissimus* juxta ac *prudentissimus* monet *commate vicesimo secundo*, *apud te ipsum habe in conspectu Dei*. Dogmata, si quæ sint, uti plurima sunt, quorum gratiâ non sine summâ injuriâ in execrandas lites exardescimus, quisque sibi privatim habeat; saltem si tandem erumpant, si in totum suppressi nequeant, ne pro oraculis venditantor, quasi actum sit de iis, quibus nulla est hâc ex parte nobiscum consensus. De *particularibus Ecclesiis* idem, quod de privatis hominibus, judicium esto. Dum quod *universa Ecclesia* olim credidit, retineant singulæ, suis tantum figant *Leges, Articulos, Constitutiones*: cæteræ identidem hoc jure gaudeant. Si Argumentis hinc inde propriis dogmatibus firmandis à dissidentibus utrinque contortis disputationibusque incaluisse *Scholæ*, salvis interim *liberi judicii & conscientie* juribus, iisdem *crisis* non adè malè mulsetetur *Ecclesia*. Hoc quippe humano ingenio dandum est, ut in rebus abditis rimandis se ultrò exerat, inque novis speculationibus sibi maximè placeat, modò non extra debitos fines, quos *sacra scriptura*, quos *Ecclesiæ Catholice Symbola*, quos *recta Ratio* statuunt, abripiatur. Æternum

rixentur, quos hæc disputandi impetigo affricuit, *Scholastici*, licet fortassè in hâc animosâ & acri ingeniorum concertatione subtilitatis famæ magis quam veritati studeatur: hanc laudem per me licet vendicent habeântque, ut subtilissimi disputatores esse censeantur; sibi quoque adblandiantur, se *dogma* illud, de quo controversum erat, tot curiosis distinctiunculis evolutum, arte & ingenio tandem evicisse; suo sensu, judicio suo, cum vel error menti malè instructæ sit longè gratissimus, placidè & sine censurâ fruuntur. Addo, *Dogmata* qualiacunque sint, summâ *Religionis Christianæ* illæsâ, à quâvis *Ecclesiâ particulari*, sopiendis litibus, ne susque deque sententiarum divortiis omnia misceant novarum rerum cupidi, in *Articulos* tanquam in *instrumentum Pacis & Concordiæ* condantur, à suis ut *pia*, ut *verissimilia* habeantur, modò cum *fundamentalibus Fidei Articulis* pari passu non incedant; modò cæteris *Ecclesiis*, quæ alienæ jurisdictioni subsunt, non sint fraudi; modò ut ab *universis Christianis* quocunque sub *Axe* positis sub pœnâ diri *anathematis* recipiantur, *authoritatè Apostolicâ* prætextu, non decretum sit. Ut verò inter *Scholasticorum* placita, quæ novitatem sapiunt, & *scripturæ* effata nihil discriminis intersit, ut id honoris, quem sola infallibilis veritas exigit, humanæ Authoritati, errori affectibusque nimium quàm obnoxia, deferatur, ut *privatorum Dogmata* in numerum pro *necessitate salutis credendorum* transeant, ut tot *temerariis definitionibus sanctionibusque* cogatur assensus, qui optimo jure liber erat relinquendus; hoc est, quod hodiè urit orbem *Christianum*, & ipsius paci officit.

est. Hoc omnium proborum, qui liberè sentiunt, cordolium, hæc superioris ævi, quo in *reformandâ Ecclesiâ* tantoperè insudatum erat, justissima querela, quam ab ipsis quoque *Romanensibus* extorsit veritas. Hâc audaciâ inestum *Schisma* vel seris nepotibus maximè deplorandum, tot tantisque malis gravidum, omnémque exinde redintegrandæ *Communione Ecclesiasticæ* spem, ni hujus dissidii auctores ipsorum vesaniæ pœniteat, sublatam, impendiò dolemus.

Rem seriò perpendenti quàm maximè obstupescendum videbitur, alterum illud *Sacramentum*, quod in mutæ contesserationis & *fidei* in eundem *Salvatore* crucifixum, quem illud verè & realiter exhibet, indicium instituerat *Christus*, astu Diaboli & hominum nequitia catenùs perverti potuisse, ut hinc illi, quos *eiusdem Corporis & sanguinis pretiosi* compotes esse voluit, sibi invicem salutem mutuam isthoc pretio procuratam redemptamque invidendi occasionem arreptum irent. Ecqua enim alia ratio obtenditur furoris, qui *Zeli* titulo arma capeffivit, *Dei* causam quasi vindicaturus, intulitque hoc *Sacro prætextu* tot strages Mundo, nisi quòd in sententiis de hoc *mysterio augustissimo* declarandis paulò variatum sit? Quantum sanguinis ubique effusum fuit ab exacerbatis, quæ mutuam spirant internecionem, partibus, litibus hisce *Sacramentariis* eheu! quàm infelicibus! in funestum bellum tandem conversis! Hinc quoque tum gladio tum igni sævitum est ultra omnem *Ethnicorum* rabiem, in tot millenos, omni alio scelere puros, *hâc præcipuè de causâ*, eò quòd à *Transubstantiationis* Dogmate abhorruissent. *Christum* verè adesse sub sa-

cris

cris *Symbolis*, seque *verum Corpus Christi*, post *Elementorum consecrationem*, percipere, nemo non fitebitur: hanc vero *fidem Christi* instituentis verbis fundatam, de quâ generalis omnium consensus per omne *Christianismi ævum* increbuit, in *veram Sacre Communionis tesseram* acceptum iri, quis sanæ mentis non dixerit, nisi præceptis ira obstitisset? Si simplici hâc fide contentus, neglectis *curiosis inquisitionibus*, rem *Sanctissimam* quisque serîo egisset, si *præsentia modum Ecclesia Romana, Consilio* primùm *Lateranensi*, deinde *Tridentino*, non temerè definivisset, si *Lutherani* cæterique sibi solis hâc in re sapuissent, nemini præscribentes, damnantes neminem, diversæ licet opinionis, coram iisdem *Altaribus*, à quibus hodiè arcemur tanquam profani nondùmque initiati, à quibus etiam aufugimus, uti olim ab *Idololatrarum sacrificiis*, genibus provoluti, cum maximo tum pietatis tum concordia fructu *iisdem sacris* interfue-ramus. E *Sacerdotibus* nemo cuiquam *Laico* ad venerabile hoc *Sacramentum* devoto corde anhelanti id communicare, è *Laicis* nemo à quoquam *Sacerdote* ritè ordinato idem percipere metuerat.

Quod de aliis complurculis ejusdem prorsus momenti, quæ salvâ *fide* in disceptationem veniunt, dicendum habeo: dum enim exclusis aliorum interpretamentis, sine *scripturarum sacrarum & Apostolicæ Traditionis* autoritate & subsidio, ad novas determinaciones descenditur, dum, quod usu hodiè sit, *Scholasticorum* argutia, & *rixosæ Theologie*, quam otiosi homines ingenio subtili malisque *ratiocinationibus* nimium quàm fidentes, procuderant,

rant, placita, tali in pretio apud quosvis sunt, ut necessariæ *Christiane religionis appendices* esse censeantur, dum *Articuli Fidei*, qui vetustiora *Ecclesie Catholice* secula prorsus latuere, quasi in immensum, uti ex hodierno *Ecclesie Romane* statu obscurisque aliarum *Ecclesiarum confessionibus* liquet, ad libitum augmentur, quid aliud hoc Zelo, hâc industriâ effectum fuisse experimur, nisi ut, *Orbe Christiano* in tot partes distractio, penitus tollatur *Concordia*? Sed de hoc secundo *Diffidorum* fonte satis à me dictum est, & fortasse plusquam satis. In reliquis, quæ supersunt, explicandis, non est, quod longo sermone vos morer, vestramque mentem patientiam.

III. Non leve momentum promovendis augendisque *Christianorum Discordiis* adhibetur ex effræni istâ, quæ *Romanis Pontificibus* olim adhæserat, & etiamnum adhæret, dominandi libidine. *Ecclesie Romane* magnitudini parùm convenisse videbatur, ut antiquo *regionum suburbicariarum* limite includeretur: quippe non *ordinis primatu*, non veteri *Patriarchatu*, cui tamen *Ecclesie Britannicæ* non subiacebant, reliquisque privilegiis ob honorem majestatemque *Urbis*, quæ principem & mundi domitorem populum è sinu ipsius quaquaversum diffuderat, tandem collatis contenta, *majorum* exemplo, imperium in *universum orbem*, ubi ubi degunt *Christiani*, superbè ambit. Si cæteri *Patriarchæ*, quibus id honoris eadem Authoritate h. e. *Imperatorum gratiâ*, *Consiliorumque Generalium* decretis & constitutionibus delatum erat, (in quo assignando eos ad Civiles earundem *civitatum* dignitates & privilegia solùm respexisse ex penultimo *Canone Con-*

fili *Chalcedonensis* liquet) jura ac libertates adversus *Romani Pontificis* molitiones tueantur; si alieno jugo subesse nolint, ni *Romam* tanquam magistram & dominam turpi obsequio adorent, ipsiusque *Decretis* obsequantur, actum est illicò de iis, postulantur *Schismatis*, nec digni judicabuntur, quibuscum *Sacram* retineant *communione*. Cum post divisum etiam *Imperium* diù inter *Orientem* & *Occidentem*, saltè simulatà *Pace* concordatum fuerit, post omnia turbavit *Romanorum Pontificum*, qui *Græcorum* rebus quasi suis intercesserant, ambitio. Neque enim aliam originem fatale illud dissidium habuit, licèt vulnus magis magisque recruderit, cum *Articulus* ille de *processione Spiritus Sancti à Filio Symbolo Constantinopolitano Romæ* adderetur, inconsultis primùm *Orientalibus Episcopis*, imò post acerrimè refragantibus contendentibusque, id per *Canones Synodi Ephesina* nullatenus licuisse. At res in *Occidente* securiùs agebatur, nisi quòd unus & alter huic *Tyrannidi* subindè sese opposuerint, irritò licet conatu.

Dum vero spretis *Canonibus* in omne jus Divinum humanumque grassandi licentiam sumunt, dum quicquid est uspiam *Ecclesiasticae Autoritatis* ad se trahunt, dum in *Conscientias* dominari cupiunt, nec quippiam credendum fuerat, nisi quod *Romana Curia* liberet, eccui mirandum videbitur, *Orbem Christianum*, tot malis è veterno excitatum, de hujus *Tyrannica potestate* exercitio tandem queri, & de recuperandà *Libertate* seriò meditari cœpisse? Interim quid *Romæ* agitur? num ut tot Regum, Principum, Rerumque publicarum *aquissimis postulatis* sæpè sapius repetitis debito modo

modo & cum effectu satisfiat, deliberatur? num prædia & possessiones, quas diu vi planè manifestâ inſederant, h. e. communia *Religionis* jura *Episcopis* & *populo Christiano*, quibus postliminio debebantur, cedunt? nihil minus: exclamant, frendent, infaniunt, è monte *Capitolino Vejoves* hi *Excommunicationis* fulmina contorquent in eos, quasi in tot sacra capita, à quibus hoc piacularè crimen admissum erat, eò quòd eos *Romanæ servitutis* fuerit pertasum. Hoc est, quod ipsis adhuc doleat, quod tot malis artibus præstigiisque hodiè eant repetitum: hoc est, quod *Schisma*, ni omen avertat *Deus*, æternum esse faciat. Neque enim quicquam aliud expectandum est, cum non aliâ conditione, quantum per ipsos est, *Pax* acquiratur, nisi amissæ *Libertatis*, nec quieti esse sinamur, nisi ad jugum desuetum excussumque stupidi redeamus.

IV. Has circa *Sacra* lites discordiâsque, quibus miseri mortales agitamur, in tot *Sectas* discissi, hinc quoque oriri tristi experimento satîs liquet, quòd, obrepente animis desidiâ, pietatis studium refrixerit, & à sanctissimâ vivendi, quam præscripsit *Christus* beatissimus noster salvator, normâ adeò turpiter descitum fuerit. Non est, quod in molliem, in luxum, in malefanos affectus, in ferinos *Christianorum* mores, quibus *Orbis hic noster* vix sibi integer constet, tot bellis divulsus, ut penè fatiscat, & extremum expiraturus videatur, in præſenti convocatis Argumentorum, quæ affatim suppetunt, copiis tragicè exclamem. Singultibus & lachrymis quam Satyrâ res mihi longè dignior visa est. Nec cum his *Christiani nominis* propudiis & dehonestamentis mihi jam agendum

est. Quam minimum veræ & solidæ pietatis apud eos reperitur, qui illam profiteri pro vitæ instituto suarum esse partium ducunt! quam plurimum verò superstitionis! dum peculiariora, quibus ab invicem distinguimur, Dogmata in iudicium *Christianismi* cedunt. Ita nimirum, pro genio sæculi, non expolendis moribus, sed opinionibus sedulo incumbitur, nec ut vita *Sanctissimæ professioni* aliquatenus quadret, sed ut Adversarios argumentis vincamus, illorumque sententiam falsi demus convictam nobis curæ est. At! at! quanto minus Pietatis Officiorum studio attenditur, magis detrahitur charitati: acriori quidem Zelo pro rebus leviusculis dimicandum esse autumamus, de *vita* parùm *Christianâ*, hâc fallaci & adulatoriâ methodo, cum *Deo* quasi decisuri. Frustra de nostrorum temporum infelicitate querelas effundimus; per nos ipsos, si velimus, meliora sperari fas est; si redeunte, quæ diu exsulavit, Pietate, morumque disciplinâ restitutâ, *rem Christianam*, quæ verâ in *Deum* pietate, in Proximum charitate, bonisque operibus, non irâ, non odio, non rixis subtilibusque, ubi de *Summâ religionis* convenit, quæstionibus perficitur, tandem seriò agamus, tot partes hodiè avulsas distractâque citò coïcturas, *pacemque Ecclesiasticam* de facili redintegratum iri, non vanum erit Augurium.

Dum verò adeò malis moribus & præter propter *vitam Religiosam* vivitur, dum relictis charitate & modestiâ adeò altum sapimus, ut cæteros, qui à nobis paulùm dissident, desipuisse censeamus, dum *Sectæ* adhærescere & in *partium diversarum* Patronos fulminatrice sen-

fentiâ invehi præcipuum *Religionis* Argumentum habetur, dum ritibus placitisque *Scholasticorum* intenti, quod *Christus* & *Apostoli* faciendum præceperint, securè, quasi longè minoris esset momenti, negligimus parvique facimus, ex hâc malè collocatâ industriâ, ex hâc insanâ *Ingeniorum* pugnâ, interruptâ *Communione*, rem *Christianam* pessimè habitum iri, &, succrescentibus quotidie novis præjudiciis, malum hoc magisadolescere, nemo est consilio aut misericordiâ adeò vacuus, ut non id dolens gemensque quidem fateatur. Non mihi imputabitur, quod à vobis, *Auditores*, maximè deprecor, quasi senserim, nostrâ non referre, cuinam è tot *Christianorum Sectis* nos ipsos addixerimus; absit. Pares tanto beneficio gratias *Deo opt. max.* referre non opis est nostræ, eò quòd *Ecclesiæ Anglicanæ* verè *Catholicæ*, quæ inter reformandum regiminis *Apostolici*, & purioris doctrinæ tenax, à labe & corruptelis, quibus pulcherrimam *Religionis* faciem deturparant *Romanenses*, tantùm recesserat, sinu nascentes & sacro lavacro tincti excipiamur. Interim, ut iniquissimæ censuræ, quam præcavendam cupio, *Apostolicam* objurcationem opponam, *Vers. 4º.* Tu quis es, qui condemnas alienum famulum? proprio Domino persstat, aut cadit: stabilietur autem, potest enim Deus eum stabilire. Nec dicere verebor, nullusque dubito, quin vos omnes, *Patres & Fratres in Christo venerandi*, ejusdem sententiæ fautores juxta mecum sim habiturus, extremo judicii Die majorem probæ & honestæ vitæ quam sanæ opinionis à Christo iudice habitum iri rationem; neminem, qui *Christianam*

professionem laudabili *vita* instituto decoraverit, licet in quibusdam, ni obstinatio mentis accedat, perperam sentientem, damnandum; & denique eos, qui, diversæ utpote *Communions*, in terris se mutuis convitiis proscindunt, deque ipsorum *mutuâ* salute penè desperant, ob salutarem *fundamentalium Articulorum* vim, modò iisdem *vita* pura & verè *Christiana* superstruatur, per gratiam & misericordiam *Dei*, æternâ pace in Cœlo ■ simul regnatu-
ros.

Sed de *dissidiorum originibus* hætenus; restat, ut de *Remediis*, quod secundo loco proponebatur enarrandum, quorum ope tot malis inde in *orbem Christianum* irruentibus, occurrì possit, paulò disseramus.

De componendis dissidiis frustra laboramus, vanique ad *Ecclesiæ primitivæ unitatem* anhelamus, nisi de *Censuris*, quæ hætenus exclusere omnem charitatem, quibus ab invicem impetimur, quippiam alterutrinque remittatur, & iisdem mediis, quibus in *Sacris Communionem* sartam tectam retinuere veteres *Christiani*, in eâ revocandâ paritèr utamur. In hac methodo si utrinque pacatis affectibus sit consensus, non erit desperandum, quin felicem exoptarumque exitum habeant *pacifica consilia*, piique dissidentium animos conciliandi conatus. Media autem *pacem Ecclesiasticam* redintegrandi, quæ dissidiorum causis supra recensitis directè respondent, in præsentì, quâ potero brevitate, exhibebo.

Quorum primum esto hoc: Sola *simplex vetûsque fides*, è *Scripturis* èque *Generalium Consiliorum Symbolis*

holis eruenda, usu ab universis *Ecclesiis Christianis* recepta, rejeclis quibuscumque opinionum faciniis assumentisque, tanquam creditu ad salutem *necessaria* urgeatur. Cum hâc fide communi tanquam glutine *Ecclesiam Catholicam* sibi firmiter cohærentem *sanctâ Communione* usam fuisse certo certius sit, cum *Catechumeni* hanc *Fidem*, quæ paucis constabat *Articulis*, post debitam Institutionem professi, *Baptismatis* gratiam consequerentur, hoc ipso nomine *Sacratissima Eucharistia mysteria* percipiendi jus habituri, nullâ aliâ conditione exactâ, cum in hâc apud omnes *Christianos* (neque enim hoc sacro nomine dignandi sunt *Socinistæ*, qui totam *Christianæ Doctrinæ* compagem *Sophisticis ratiociniis* & mente *arrogantissimâ* convulsione eunt, qui in *Christum æternum Dei filium* blasphemii, *Dei nostri gratiam transferunt in lasciviam humani ingenii*, & *solum illum Deum ac Dominum nostrum Jesum Christum negant*) plenissima sit ubique animorum consensus, quidni *sacra Communionis* fundamentum *primæ Ecclesiæ* exemplo & praxi in hâc quoque solidetur? Quo prætextu post *Fidem* ubilibet receptam, & à *Christo Apostolisque* stabilitam, post tot secula quippiam Dogma ut necessario credendum superaddi licet, de quo apud veteres nemo vel fando unquam inaudiverit? quo jure tantus *Articulorum* numerus obtrudi debet, præsertim verò cum testatum habeamus, hoc non *Religionis* sed solius *commodi* secularis & famæ promovendæ gratiâ factum fuisse? Quod adeò malè inter *Christianos* conveniat, ac si non eadem sed *multiplex credendi Regula* olim proponeretur, non *Christo*, non *Apostolis*, non *Religioni*,

ni, quæ totum illud, quod salutis assequendæ satis superque conducatur, absque perplexâ verborum, ne quispiam crassioris ingenii criminetur difficultatem, ambage cuivis vel mentis compoti expandit; sed *Zelotis* quibusdam, qui *nova dogmata* pro *Oraculis* venditantes, ea sub *diris* & *Anathemate* amplectenda *orbi Christiano* fastuosè obtrudunt, id unice referendum est. Quanti furoris erit argumentum, quod *Romanenses* faciunt, in nos ob hæc opiniones rejectas, nudiustertius enatas, nullâque *Scripturarum* aut *Antiquitatis* auctoramento communitas debacchari? At non soli, quod fortassè aliquantillum solatii miseris exhibebit, infelix posteritas damnabimur, quin & purissimæ *Antiquitatis* cultores, qui *novi Symboli*, quod *Pius IVus.* condidit, Articulos neutiquam admiscere, in eandem societatem trahendi sint. At! at! si de iis ipsis, qui *Fidem* ac *Religionem Christianam* adversus *Heresum* pestem latè grassantem *symbolis* & *scriptis* tanquam amuletis munierunt, qui vitæ & sanguinis effusissimè prodigi & crucis candidati erant, qui flammæ amplexi igneis vehiculis petere Cælum, tuendæ fidei veræ intentissimi, quos meritissimo *Sanctorum Titulo* grati colimus, benè sentiendum sit, nos eorundem vestigia secuti, satis tuti, satis securi erimus; neque est, quod ab his *brutis fulminibus*, quæ in nos vibrantur, ullatenus metuamus. Ubicunque dispersi erant *Christiani*, sive sub *Patriarchâ Romano*, sive *Alexandrino*, sive quocunque alio, hujus *Fidei* auctoramento tanquam *Fratres* agniti, ad eandem salutem, quam neque sibi invicem invidabant, neque negabant, omnes simul & concorditè eorundem sacrorum consortio anhe-

anhelabant ; tantâque *charitate* , ut illud obiter interponam , flagrabant , ut nec de *Donatistis* , qui de iis pessima dixerint , malè ominarentur ; ne dicam ipsos de * *Arianis* cæterisque *Hæreticis* non omnem spem abjecisse.

II. Articulis , sine quorum explicitâ *fide* nemo *Christianus* futurus est , admissis , de cæteris *Dogmatibus* liberum cuique esto iudicium. Non enim magis Opinonum quam rituum varietas *fidei unitatem* dissolvit. Quam vulnus illud hiulcum , quod dudum corpori *Ecclesiæ* inflixit *Schisma* , de facili coisset , si , hâc Medicinâ adhibitâ , tot *confessionibus* , tot novis *Canonibus Tridentinis* , quibus *Christianorum* mentes opprimuntur , *fidesque* subtilibus *argutiis* redditur implicatissima , de rebus incertæ & planè dubiæ veritatis , non adeò *dogmaticè* decerneretur ! Optandum foret *Christianis* universis , & potissimum *Reformatis* , quorquot à *Romanæ Ecclesiæ Communione* expulsi recessere , de singulis *Religionis* apicibus convenire potuisse : sed cum id vix quispiam speret præ multiplici hominum ingenio & captu , præ iudiciorum diversitate , præ variis interpretandi *Sacram Scripturam* modis , cum non idem lumen , non eadem copia Argumentorum , non eadem concludendi vis cuivis suppetat , quidni *Pacis* amoris pervicaciam mentis posthabentes , *dogmata* propria ita amplectantur , ut cætera concordes , siqui , in *fidei fundamentum* non impingentes , aliter sentiant , *Christianâ* moderatione & *evangelicâ* ferant. Faceffat idè illud maledicendi *Cacoethes* , quod in naturam & Religionem vertitur , *dogmatumque* , si commodè sine dispendio veritatis explicari possint , odiosa insectatio. Hâc enim

* Vide *Salvianum* de gubernatione *Dei* lib. 5. pag. 100. ex editione Baluzii.

vicissim concessâ Indulgentiâ , quam moderatioris ingenii homines , *Pacis sequestri de arbitri* , ut æquissimam suadent, quantum commodi in *Orbem Christianum* redundaturum sit , nemo est ingenii adeò deplorati , qui non facile præfagiat.

III. Antiqui de regimine *Canones Ecclesiastici* restituantur , ut *Episcopo Romano* in ordinem coacto , & evanescente *Oecumenicæ potestatis* prætextu , quicquid *juris Ecclesiastici* ipsis *Canonum* vigore competit , *singula Ecclesiæ* tandem recipiant. Meminerint interim *Romanenses* , hâc iniquissimâ usurpatione , violatæ pacis tandem convicti , *Communione* cum ipsorum *Ecclesiâ* in necessariis ad salutem olim non habitam fuisse , nisi quatenus ipsi cum *Ecclesiâ Catholicâ* convenisset. Quantæ olim concertationes litesque cum *Romanâ sede* agitabantur , ne quippiam de jure periret ! Privilegia sua vindicavit *Ecclesia Orientalis* , sua *Meridionalis* , utraque ac *Romana* in varios *Patriarchatus* distincta , ex *Decreto Consilii Nicani* , iisdem Privilegiis suo limite & districtu singulæ fruebantur. Neminem huc usque *Oecumenicæ Authoritatis* adipiscendæ desiderium titillârat , nemini in titulum noménque cesserat , *Episcopus universalis*. Solus id sibi & successoribus adscribere ausus est *Bonifacius* , quasi totus mundus intra *civitatis Romæ* pomeria esset concludendus. Obstupuit mundus , nec sibi adeò fœdè imponi passus est. *Carthago Christianismum* amplexa , *Romæ æmula* , *Romanum Pontificem* æquè sprexit , ac olim *Senatum*. *Constantinopolis* honorem primæ Sedis , licet interdum invita , cedens , sui juris mansit ; nec licèt hodie Captiva , pristinz dignitatis adeò stupidè obliviscens , ut *Romana Sedi* tanquam *Domina* blandiatur : *Turcarum* tyrannidi
ce-

cedens, *Romanensium* verò, ut conjectari fas est, nunquam cessura. *Communione* cum ipsâ, uti & cum cæteris *Ecclesiis Catholicis* totius *Orbis Christiani*, actu vel saltem desiderio, si tolleretur impedimentum, sibi retinendam sui esse officii duxerunt, autoritate, quam arreptam ad eò impendiò voluit, interim rejectâ, quod & nos hodie præstaremus, si per ipsam licuisset. Esto *Episcoporum primus Pontifex Romanus*, modò non solus, quasi cæteri ipsius *Vicarii* essent, modò non *universalis*, modò aliorum jura, quæ eâdem lege *Ecclesiasticâ* nituntur, inviolata maneant, modò *Constitutionibus Apostolicis Romana Curie* Decreta non repugnent, ac intra antiquorum Canonum limites sese contineat *Romana jurisdictio*. Quo obice amoto, ineundæ paci via lata sterneretur. Hoc omnes probi, omnes, nisi quorum intererit æterna esse dissidia, usque & usque ardentissimis votis efflagitant, unionem his conditionibus avidissimè amplexuri, si quicquid est *superstitionis in Ritibus & Cultu Sacro* tollatur, sique *diris*, quas in dissentientes vibrant, subductis, *sola creditu necessaria veritas*, juxta *veteres formulas*, proponatur, in cæteris relicta judicandi libertate.

Hoc ni fiat, coram Deo *Romanenses* violatæ *Communioni* usque postulabimus, per quos planè stat, ut tali beneficio *Ecclesia Christi Catholica* hodie destituatur. Interim quascunque *paci Ecclesiasticæ* conditiones cum gaudio quidem arrepturi sumus, modò exinde non lædatur *Conscientia*, modò *principiis & analogiæ fidei* non contra eant, modò *Scriptura* ejusque genuina interpret *primæ Antiquitas* in *Dogmatibus* statuendis summæ *Autoritatis* esse admittantur, modò *regimini Ecclesiastico*

nullum fiat præjudiciū , modò denique cuncta ad nor-
 mam *Canonum Consuetudinūque* , quæ per *universam Ec-*
clesiam pristinis seculis obtinuere , exigantur. O feli-
 cem illum *diem* , quo dissidiis , ad quorum memoriam
 horret animus , sublati , omnes , qui unicum eundem-
 que *salvatorem crucifixum* colunt , fraterno affectu in u-
 num coibunt ! At ! at ! per improbos *Christianorum*
 mores illud neutiquam exspectandum est. Pristinā pi-
 etate nobis opus est , si pristinam concordiam velimus
 restitutam. Eheu ! deside ac propudiosā *Christianorum* vitā
 à veterum exemplo ubique desciscitur : in artem rixandi
 abit *Religio* , quasi vita morūque norma esse desisser.
 Per vitia nostra nobis non licet esse tam felicibus , tam
 beatis. Hæc impedimento sunt , quò minùs in eadem
sacra Communione concorditè vivamus. Deum ergo sup-
 plicibus votis exoremus , ut omnes , qui se *Christianos*
 profitentur , eodémque sacro insignantur nomine , unde
 exciderint , tandem memores resipiscant , & *priora o-*
pera , opera veræ ac solidæ pietatis , faciant ; ut iniquis-
 simis censuris controversiisq̃ue futilibus omissis , quæ
 ad pacem faciant & quæ ad mutuam edificacionem , secten-
 tur ; ut denique in viam veritatis conducti , in unitate *Spiri-*
tus , in vinculo pacis & sanctitate vitæ , Fidem verè *Chri-*
stianam , verè *Apostolicam* , verè *Catholicam* retineant. Ira
 laboranti inter tot tumultus *Ecclesiæ* succurrat ille mise-
 ricordiarum Pater , propter Merita *Jesu Christi Salvatoris*
nostri , cui cum *Patre & aeterno Spiritu* sit omnis Laus &
 Honor in Secula Seculorum. Amen.

FINIS.

